

# Akhbar Singapura rakam penghargaan

BH 01/11/2003 - 4 PRECISE

SINGAPURA: Akhbar Singapura semalam merakamkan penghargaan kepada Tun Dr Mahathir Mohamad yang bersara selepas menerajui kepimpinan negara selama 22 tahun.

*Akhbar Straits Times* dalam lidah pengarangnya berkata 'agak sukar 'untuk membayangkan sebuah kawasan berjiran tanpa beliau. Pembetulan - katakan saja pentas dunia.'

"Beliau sedang berada pada kemuncak kekuasaan dan pencapaian, seperti yang dikatakan oleh peminatnya, malah beberapa pengkritik. Tetapi pada hari ini (semalam), beliau yang masih bertenaga meskipun sudah berusia 77 tahun, dengan rela hati menamatkan kepimpinannya dalam sebuah negara yang amat berjaya," kata akhbar berkenaan.

Rakyat Singapura antara lain, katanya, perlu melakukan penyesuaian dari segi pemikiran mereka.

"Akhbar ini yang pada ketika tertentu sudah mengakibatkan kemarahan kerajaannya yakin beliau tidak akan hanya menyepikan diri di Langkawi untuk menulis memoirnya."

Lidah pengarang *Business Times* pula memberikan fokus kepada kekecewaan Perdana Menteri terhadap orang Melayu.

Seperti yang selalu dikatakan oleh Dr Mahathir, masyarakat Melayu, iaitu kira-kira 60 peratus daripada jumlah penduduk negara, tidak memenuhi wawasan yang digariskannya untuk mereka, kata akhbar berkenaan.

Akhbar itu menarik perhatian bahawa awal tahun ini, Dr Mahathir menyatakan kekesalannya kerana selepas 35 tahun menjalankan tindakan secara tegas, masyarakat Melayu masih tidak berupaya bersaing tanpa bantuan kerajaan dan konsesi khas yang lain.

"Dalam lingkungan satu generasi, beliau meninggalkan Malaysia dengan kelas pertengahan yang kukuh (dan mungkin yang lebih penting kestabilan sosial, kelas pertengahan Melayu yang kuat)," kata *Business Times*.

Ia menyebut mengenai kemajuan da-



**DR MAHATHIR** meletakkan ibu jari pada alat perakar waktu buat kali terakhir pada jam 5.07 petang sebelum meninggalkan Pejabat Perdana Menteri di Bangunan Perdana Putra, di Putrajaya, semalam. - Gambar Bernama

lam membasmi kemiskinan.

Dari 1982 hingga 2002, pendapatan per kapita rakyat Malaysia meningkat tiga kali ganda sehingga AS\$4,000 (RM15,200) dan paras kemiskinan mutlak pula menurun daripada 35 peratus kepada 5 peratus.

Akhbar itu memberikan contoh Jam-

batan Pulau Pinang yang disiapkan dalam tahun pertama kepemimpinannya selain Lebuhraya Raya Utara Selatan, di samping rangkaian gantian optik dan Malaysia juga merupakan pasaran kereta terbesar di Asean.

Dalam berhadapan dengan kemelesetan ekonomi pada 1986, beliau membuka

ekonomi kepada pelabur asing dengan syarikat Jepun telah beralih kepada Asia Tenggara dan Malaysia pula memperolehi sebahagian besar manfaatnya.

Sekali lagi pada 1997, beliau memilih laluan yang berbeza iaitu mengenakan kawalan mata wang dan meletakkan semula negara ke arah pemulihan, kata *Business Times*.

Sementara itu, akhbar berbahasa Inggeris *Today* pula memuatkan laporan mengenai Dr Mahathir dalam muka depannya dengan tajuk: "Satu era berakhir hari ini dan Dr M bersedia belayar sendirian."

Selepas 22 tahun dengan retorik politik dan pengumuman peletakan jawatan yang mengejutkan pada Jun tahun lepas, Dr Mahathir akhirnya bersara untuk "belayar mengelilingi dunia seorang diri," akhbar itu memetik kata-kata Perdana Menteri semalam.

Akhbar Malaysia pula, katanya, bersaing antara satu sama lain untuk menawarkan edisi khas *Dr M* yang paling tebal semalam.

*The Star* malah mengeluarkan sendiri VCD khusus bagi mengucapkan terima kasih kepada Dr Mahathir dengan memuatkan penghargaan daripada keluarganya, pemimpin Barisan Nasional, Ketua Pegawai Eksekutif, masyarakat di kampung halamannya dan rakyat lain, kata akhbar itu lagi.

*Berita Harian* pula memperuntukkan tiga muka surat bagi berita mengenai Dr Mahathir dan penggantinya, Pak Lah, dan laporan muka depan tentang nasihat terakhir Perdana Menteri Malaysia kepada masyarakat Melayu pada majlis terbuka puasa di Pusat Dagangan Dunia Putra kelmarin.

Stesen televisyen tempatan, *Channel News Asia* menyiarkan laporan khas mengenai Dr Mahathir dalam berita utamanya yang disiarkan pada 9.30 malam sejak beberapa hari lepas selain turut mengadakan segmen khas yang ditujukan kepada Perdana Menteri bertajuk *Mahathir Mohamad Steps Down* dalam lawan webnya. - Bernama